

欽
定
全
唐
文

欽定全唐文卷八十六目錄

新文藝出版社藏書

僖宗一

授李鈞靈武節度使制

授崔彥昭中書侍郎判度支制

授鄭畋同平章事制

貶鄭畋太子少傅分司東都制

授鄭從讜河東節度使制

授鄭畋平章事依前都統制

授王鐸兼判戶部制

授王鐸義成軍節度使兼中書令制

授王鐸蕭遘平章事制

蕭遘罷判度支制

授蕭遘監修國史韋昭度集賢殿大學士制

授韋昭度平章事制

授建王震魏博節度使制

授鄭畋平章事制

封徐州節度使時溥鉅鹿郡王制

授鄭愚嶺南節度使制

諭秦宗權制

修奉太廟制

欽定全唐文卷八十六

僖宗皇帝

帝諱儼懿宗第五子咸通三年生六年封普王名儼十四年七月立爲皇太子改今名是月即位乾符二年正月上尊號聖神聰睿仁哲明孝皇帝光啟元年五月再上尊號至德光烈孝皇帝文德元年五月又上尊號聖文睿德光武宏孝皇帝在位十六年年二十七諡曰惠聖恭定孝皇帝廟號僖宗

授李鈞靈武節度使制

朕以沙陀驍勇重累戰功六州蕃渾沐浴王化念其出於猜貳互有傷殘而克璋報仇其意未已被我君臨之德軫吾子育之心爰擇良能俾之宣撫惟爾先正嘗鎮北門待國昌以雄傑之才置國昌於濟活之地既藉奕葉之舊又懷任土之觀是用付以封疆委之軍旅必集王事無墜家聲

授崔彥昭中書侍郎判度支制

彥昭歷試有勞僉諧無媿涉於六月秉是一心修乃文可以興文教勵乃武可以成武功重整前規兩司大計清能

壁立政乃風行姦欺屏絕於多岐請託銷摧於正議不煩
內庫有助涓毫不假外藩有進絲髮軍食所入餘剩於明
年郊廟所供克辦於今歲頗符神化真謂廟謀不有良臣
安能富國宜酬勲於黃閣俾正位於紫垣敬服誠詞永堅
茂業嗚呼秉均之道何所難哉覆車之塗近已多矣與其
樹黨不若修身與其收恩不如秉直買暫勝者貽其永敗
沽小智者囊其大愚不貴及人唯爭自我初誠潤屋尋以
危家金玉滿堂莫之能守縱經營而得位用枉撓而當辜
唯爾選自朕心採於人望宣詔既畢閑門未知來遂奔車

退無私謝獨推元老曾請急徵以守道而自臻實榮親之
最重爾其堅持正直允執規程但畏幽陰必歸公當甘言
可憚敘往可嗤獎善須明懲姦須銳利於人者雖難必舉
利於己者雖易勿爲頻念孤寒每思耕織常自勤於數事
便有望於中興彰朕知臣在卿匡國必使恩從下布法自
上行但立直標終無曲影苟致我於堯舜亦比爾於臯夔
可中書侍郎依前判度支事

授鄭畋同平章事制

頃者時鬱正途權歸邪幸爾畋執心無惑秉節被讒徵復

駕行愈洽人望旣負彌綸之業宜居輔弼之司可本官同
平章事

貶鄭畋太子少傅分司東都制

門下將相之權安危所係注專戎律秉持國鈞謂成靖亂
之謀以著匡時之績方期功就俄以疾辭仍乖撫字之方
且異毗予之道尚居崇秩猶念初心諸軍四面行營都統
鳳翔隴等州節度觀察處置等使開府儀同三司守司空
兼門下侍郎同中書門下平章事鳳翔尹上柱國滎陽縣
開國子食邑二千戶鄭畋藝高冊府譽動詞林禮樂在躬

衣簪奕代虹玉動連城之價朱絃含清廟之音才無不周
識無不綜踐歷既久聞望時稱禁林傳麗藻之工鳳沼著
經綸之業洎凶徒犯順上國罹災駕當出於全蜀鎮方臨
於右輔因時建策遂首興師上寬焦灼之懷下慰蒸黎之
望念其竭節頻降殊恩任三事之優崇授四面之節制許
於除授皆俾遵行則朕於施功之臣可謂無有愛惜而不
能傾心養士盡力惜人致興半菽之嗟竟起多寒之怨既
乖撫馭幾誤權宜賴仗義之徒叶心王事主善暗符於朕
意摧姦必建於勲庸尚保傅於承華仍優游於東洛未妨

頤養猶示渥恩凡百庶寮宜體朕意可太子少傅分司東都散官勲封如故仍且於興元管內逐便將養候疾損日赴任主者施行

授鄭從讜河東節度使制

古者公卿在朝則輔主致理有事則統衆出征是以郤穀行師爰求說禮祭遵推轂不廢雅歌今者羌寇未寧烽煙尚警慎擇鎮安之路尤資柱石之功若非文武兼才將相全業夙蘊峻望爲吾鼎臣豈傾丹赤之懷以授股肱之任開府儀同三司門下侍郎兼兵部尚書同中書門下平章

事充太清宮使宏文館大學士延資庫使上柱國滎陽郡
開國公食邑二千戶鄭從讜秀粟岳靈操含冰潔趙衰冬
日樂廣青天端操而峭壁寧偕曠度而澄波未測周密得
大臣之體誠明宏君子之儒許月品題人倫自警膺門步
武明彥知歸奮飛早踐於修途育德邁高於輿論仗節三
光於侯府題劔累涉於崇班洎擢處鈞衡若來麟鳳才惟
應物動必研幾屹若嵩巒炳符台曜嵒松磊落長標構厦
之姿和璧温良克表如虹之氣朕以北門重鎮興王故都
披全晉之山河有陶唐之風俗以爾曾施惠化尚有去思

方當用武之時暫輟調元之職爾其厚撫戰士謹備糧儲
必使黠虜革心征師賈勇善守訓齊之令以圖台鼎之勲
帖以上公式光元輔佇殲凶醜副我憂勤往惟欽哉可檢
校司徒同中書門下平章事行太原尹充北都留守河東
節度管内觀察處置兼行營招討等使

授鄭畋平章事依前都統制

門下朕聞天下安注意於相天下危注意於將爾今應吾
內外之委任也朕以塵昏寓縣血染生靈乘輿播越於道
途巡幸奔馳於巴蜀夙夜思咎寢食不遑期早殄於羣妖

冀速清於國步今則重煩台德再秉鈞衡碧幢不離於岐
山黃閣暫移於隴坻安危倚望中外具瞻諸軍四面行營
都統鳳翔隴等州節度觀察處置等使開府儀同三司檢
校司空同中書門下平章事兼鳳翔尹上柱國滎陽郡開
國侯食邑三千戶鄭畋岳瀆炳靈星辰煥發雅裁旣揚於
冰玉冲襟咸契於神明達古今理亂之源識文武經綸之
道作時柱石爲國棟梁洎周旋闕榮出入將相功業每留
於史冊懿範允播於縉紳昨鎮近藩首摧巨盜今雖狼心
漸革蠶尾將攻干戈尚遍於咸秦虵豕猶侵於宮闕運雖

至此天實賚予況誓掃寇讎志收社稷蘊沈機而愈勁奮
獨斷而不回激諭軍行倡率義旅下韞必中傳檄無疑指
呼而方面悅隨慷慨而懦夫請命風生貔武川湧熊羆期
繫頸於逡巡佇春喉於旦夕朕且念用兵汧隴駐蹕坤維
指揮而遠在一隅請急而動聞踰月於以舉疇庸之典於
以圖必勝之謀在乎盛以軍戎任其陶鑄使統制並遵於
麾下訂謨皆在於彀中將候凱還佇其冊命於戲簪裾禮
樂儼然丞相之風旗幟鼓鼙蔚爾將軍之貴裴度以出征
淮蔡敏中以招討羌戎皆仗以節旄付之樞柄期樹功業

固不同年勉圖大勲同酬殊渥位正台階之重官崇水土
之榮敬之哉無忝我重命可守司空兼門下侍郎同中書
門下平章事依前充四面行營都統鳳翔隴等州節度觀
察處置等使兼鳳翔尹散官勲賜如故仍令所司候收復
京城後備冊命主者施行

授王鐸兼判戶部制

夫足食足兵古之善政故趙充國以屯田爲上策諸葛亮
用祁連作奇謀皆前代伐叛之良規兵家聚衆之急務也
況乎命我元老平彼羣凶必兼才力之司方濟軍師之用

賴茲一舉以保萬全諸道行營都統指揮收復京城兼租庸等使權知義成軍節度使鄭滑等州管內觀察等使開府儀同三司守司徒兼中書令判延資庫使上柱國晉國公食邑三千戶王鐸偉望宏材宏襟遠慮三登台輔久領樞機蔚爲社稷之臣實重巖廊之器近以京都未克寇孽尚存妙算屢陳忠誠奮發思登壇以糾合誓建旆以掃除朕由是暫輟陶鎔俾專統制五侯九伯盡列戎行猛將謀臣皆瞻馬首得不分其國柄委以地征收租賦於四方從便宜於萬里軍須無闕天討必行副予倚注之懷全仗廟

廊之力敬承休命佇策大勲可兼判戶部事餘如故

授王鐸義成軍節度使兼中書令制

門下朕以煙塵犯闕士庶貽災思九廟以懷慚顧萬邦而
是愧危同馭朽誠甚履冰遂乃虔祝上元冀平積憤勞於
宵旰實貫神明其有捨元輔之崇副大朝之切拜章瀝懇
面奏請行者得不超茲爵秩盛以統臨今則釐施經時駐
軍未進宜更戎號以煥寵光諸道行營都統指揮諸軍兵
馬收復京城租庸等使兼判延資庫戶部事權知義成軍
節度鄭滑潁州觀察處置等使兼開府儀同三司守司徒

兼中書令上柱國晉國公食邑三千戶王鐸碩德名門清
風直道爲一時之圭表作百行之源流騏驥絕塵方知逸
勢松篁犯雪更耀寒光洎中第從軍昇朝擅價掌綸業茂
選士功高進必流芳勞惟可則專銅鹽之任副舟楫之權
雅有令名不誣信史爾後再持鈞軸重領藩維智識愈精
始終無替旋屬省方之際犯難而來首冒鋒鏑忠貫天地
由是將我大柄答爾明誠當其危阨之時實有整持之計
沈機累獻祕畫頻聞漸理綱條儼予班序致使簪裾復盛
禮樂重興克念爾勞諒洽人聽而又忿茲國難期以身先

懇望統師力求專伐既佇平於狡穴貴獨耀於將星宸命
登壇俾之仗鉞及之白馬疊降紫泥雖嘉將就之勲尚滯
進軍之策而諸軍觀望相顧遷延將謀盪定之期因有改
更之制在吾優賢之道求舊之心俾循和嶠之榮敷其五
教更假卻縠之用惠此一方爾宜振彼宏圖聳於東夏式
資論道共贊中興體我深懷敬承休命可檢校司徒守中
書令使持節滑州諸軍事守滑州刺史充義成軍節度使
滑潁等州觀察處置等使散官勲封如故主者施行

授王鐸蕭遘平章事制

門下五帝垂衣本資乎輔弼三王御宇必藉其謀猷誠聖
哲之規章實邦家之軌範然則得其人則天下致理輕其
任則海內多虞興廢之端古今斯在開府儀同三司行太
子少師上柱國晉國公食邑三千戶王鐸台階降瑞鼎位
呈祥峻極承天清暉助日保道德而立性因文章而飾身
良玉重礪貞金百煉道惟經濟自西號以安人術本匡時
辭東山而爲國洎歷揚中外出入班行栖息鸞臺優游鳳
沼榮膺三事冠絕羣寮致君之業彌深及物之功益著朝
散大夫守尚書兵部侍郎判度支上柱國賜紫金魚袋蕭

金史卷之八十二 三十一
遘紫庭鍾律元圃琳瑯韻協金莖光昭袞黻自精通藝行
履歷清崇逸翰摩雲高踪絕地近者臺綱稱職歲計成功
霜威已戢其奸邪日用無虧於饋輓昨以東隅寇盜嘯聚
爲羣倣擾關防奔衝畿甸朕巡遊梁益將復京都欲救生
靈必資賢相鐸乃朝廷碩德社稷誠臣戴君之力無窮許
國之心益勵是使重敷五教爰總萬端勿弃前修無忘厚
獎遘乃孤標特立潔白不渝利可割犀清能鑒髮輔成乾
道兼領冬曹各副憂勤可安宵旰鐸可門下侍郎兼司徒
同中書門下平章事散官勲賜如故仍令所司擇日備禮

冊命邁可銀青光祿大夫守工部侍郎門下平章事仍落
下判度支事主者施行

蕭邁罷判度支制

門下夫宰相之任本於佐理陰陽節宣風雨允釐百工康
濟萬邦豈可以經費之煩勞弼諧之重比以戎車方駕國
用未充將欲定其準繩遂兼委於衡軸今則立事有制成
規可遵既陳堅確之誠益尚執持之節宜加懋寵用示渥
恩特進行中書侍郎兼戶部尚書同中書門下平章事監
修國史上柱國蕭邁功高作礪業茂秉鈞韻同曼玉之清

應作鏗鐘之響九流百氏供筆下之波瀾五色六章集人間之光彩真爲王佐衆號國楨射策詞高曳裾望重優游華貫黼黻明庭和符律呂之音邁合鸞皇之影響洽多士聲振天朝負巖樂之才華旣司天語將徐庾之事業尤潤帝謨爰執憲綱搢紳自肅及專邦計饋餉無虧倚注之期朝昏是屬旋以塵侵羽衛寇犯郊畿保於患難之中不改始終之節首奔行在備竭忠謀明知管葛之才足副臯夔之選朕念茲士庶深痛傷痍授以鹽梅拯其塗炭及總機務大庇生靈盥薦之道益光奉上之心尤著藉其敏果委

卑繁難果能窮利病之源去奸欺之弊事皆條貫法以彰
明特進退讓之誠益重變調之任爾宜潛施秘略益進昌
言激猛將以弭羣凶召和風而銷戾氣焚巢盪穴促其獻
捷之音定賞策勲乃是銘鐘之日則更加峻秩別示寵章
宜升黃閣之尊式表納言之貴可門下侍郎兼吏部尚書
門下平章事監修國史散官勲如故仍落判度支

授蕭邁監修國史韋昭度集賢殿大學士制

門下宰相之任調元氣以作輔執大柄以匡君況狂寇未
平戎車尚駕顧我勤勞之意在茲籌畫之功雖循舊規式

加新寵光祿大夫行中書侍郎兼禮部尚書同中書門下
平章事充集賢殿大學士上柱國蕭遘琮璜上瑞韶護正
音灑落襟靈品流多士有仲山補袞之助抱子房借箸之
謀銀青光祿大夫行兵部侍郎同中書門下平章事上柱
國韋昭度山岳蘊靈星辰耀彩澄澹不撓端莊自持懇懇
常務於變諧孜孜不忘於贊理而皆便蕃顯貫履歷清華
爲宗廟之棟梁作邦家之柱石言成損益知合著龜彌彰
及雷之誠盡著匪躬之節每聽爾嘉話寬我殷憂所宜縱
掌上之奇兵弭茲寇孽啟胷中之利器翦彼妖狂佇見中

興之期須茲輔臣之力安危是注倚仗彌深地官既示其
加恩大儀式彰其峻秩掌東觀陽秋之重總石渠刊校之
權茂勲增榮崇階示貴久處黃閣宜正紫垣庶其更運籌
謀速見平蕩佇丹青垂美鼎彝勲高永茲魚水之歡用契
雲龍之會承我茂寵爾其勉之邁可特進行中書侍郎兼
戶部尚書同中書門下平章事監修國史勲如故昭度可
光祿大夫行中書侍郎兼禮部尚書同中書門下平章事
充集賢殿大學士上柱國勲如故主者施行

授韋昭度平章事制

門下朕聞先王之道相者調變陰陽則四時順其序均和
品彙則萬物適其宜然後扶危持顛易亂成理俾生植咸
遂邦家克康故周卜帝師得諸渭水殷夢賢佐求之傅巖
我擇股肱獲之侍從翰林學士承旨銀青光祿大夫行尚
書兵部侍郎知制誥上柱國韋昭度誠貫金石行通神明
氣含元精識洞著祭窮文武弛張之道作棟梁舟楫之資
爲時間生作我良輔洎昇名俊造厯官清華鴻翥九霄驥
逸千里旋召宥密備著聲猷使我語言追三代之風使我
典則符百王之法當風雨之如晦勵節敬恭念艱難之在

途夙勤晨夜臨難得近臣之體效忠彰明哲之心是用總
以萬機納於百揆作邦之楨秉國之均若魚水之相歡諒
雲龍之合應君臣之道今古攸同於戲竊逆滔天兵戈散
地官朝未復宗社靡寧爾宜動察安危居圖匡濟設六奇
之秘策發三略之沈機定元凶於一戎振頽綱於四裔紹
貞觀太平之業啟開元中興之期光贊一人永阜羣庶勉
集盛烈勒功盤彝往欽哉敬服休命可守本官同中書門
下平章事勲賜如故主者施行

授建王震魏博節度使制

門下玉斗七星降作帝王之子金枝百代生爲列聖之孫
冬夏教以詩書春秋訓以禮樂然後封其茅土示以寵光
建王震天賦明哲氣稟粹和含日月之英華蘊山河之瑞
秀心懸壽鏡腹貯學川智燭不稟而自明德車非駕而引
重信逾翦葉名掩刻舟九苞之鳳儀赤霄五色之麟行丹
地瑤池仙派非百水之同流銀漢靈源自三天而別注沉
幼稟師訓生知義方游雷之象克明元良之名益著四教
咸備三善永全喻葛藟之延長表瓜瓞之昌熾仁義道振
孝忠聲聞似覩卿雲如觀景宿堪膺寵擢可賜爵封列國

之榮暫領雄藩宜遵故事可授開府儀同三司守太保充魏博節度管內觀察處置等使兼魏州大都督府長史仍令所司擇日備禮冊命主者施行

授鄭畋平章事制

門下任賢勿貳有國之令圖惟帝念功昔人之善訓朕遐觀往代每慎厥終其有道濟邦家任已崇於屏翰忠存宗社義可貫於神明宜徵帷幄之謀重委廟堂之算冀清大難以啟中興開府儀同三司守太子少傅分司東都上柱國滎陽縣開國侯食邑二千戶鄭畋八柱比崇三階垂耀

繁露演先儒之學高風追大雅之文外標威鳳之儀內貯
函牛之量煥如綸之旨共許才高被貝錦之辭彌彰道直
體茲全德歷試崇資變贊中樞極致君之事業鎮臨三輔
標坐樹之威名洎虜犯封畿塵飛象魏避狄之謀既決微
管之賴誠深而能竭預慮之機用安君父舉從權之計以
誤奸凶當代之勲格天莫比此際雖咸思義舉盡蘊忠謀
且聞盟主臧洪登壇有誓將軍祖逖擊楫忘身致蕃漢之
齊驅由懷柔之有術今則不從人望內斷予衷罷列岳而
登三公自金壇而昇玉鉉魚水之歡盡在君臣之契可知

於戲寰宇未清予則仗綏懷之毗園陵失守予則佇收克
之功次則揚惠化以拯窮人宏無私而敘羣品山河有誓
金石豈渝更俟殊庸以膺極寵可守司空兼門下侍郎同
中書門下平章事充太清宮使宏文館大學士餘如故仍
命所司擇日備禮冊命主者施行

封徐州節度使時溥鉅鹿郡王制

天用日月司之以晦明帝賴股肱寄之以休戚念其功則
報無所恡厚其賞則誠在可危爾勿徇於驕盈吾靡勞於
姑息也時溥爲時傑出臨難慨然用禮樂爲身基知德刑

爲戰器文惟附衆武足取威萬旅無譁一方底定朕以彭
門人兼僉楚地控淮河因命專征果聞善訓公忠所化氣
俗自平極將相之崇高作藩宣之軌則噫成功未易持祿
尤難倚伏相循安危是繫朕嘗覽祖宗之紀每欽兼濟之
圖尚父汾陽王太尉武穆王皆道合中興勲高往烈然子
儀以恢宏體國保富貴於永年而光弼雖剛正奉公積猜
嫌於晚節蓋坦懷未至則全美或虧言念大臣足爲前鑒
惟爾竭誠保奉著節始終疇咨雖顯於上台制爵宜加於
異姓彼邦遺事故老當傳勿勞銘鼎之恭用永紳河之誓

服茲休寵慎乃令圖庶俾君臣永於竹帛

授鄭愚嶺南節度使制

門下朕推轂求才登壇命將每於邊遠尤屬賢能沉邕南
地界蠻鄉甫新戎號外虞連歲創痍焚劫之餘上將開藩
兵甲繕完之始中權所寄慎固尤難

一作慎
東固難

用迴攘接之

仁往整律竭之旅某官鄭愚價高東序氣茂南薰挺超卓
之奇名蘊精剛之利器詞源獨濬其波瀾經笥莫窮其韜
略佇自郊堂擧秀儉府增華霜暑諫垣聯翩羽翰郎曹史
館洋溢聲光益部播戎率之功商嶺著條刺之跡博洽強

志居無流心遠略精能動有餘地日者熟其業用委以察
廉果能宣布惠和講求利病纔報下車之政已蘇闔境之
人發爲歌謠流滿道路朕以朗寧地分零桂共控夷蠻將
以重城鎮於兩江壯服領於西道俾崇旄節用固疆陲而
屬統馭有乖拊循生變戎章旣失城守已離宜得通敏之
材以敷勞來之旨是用輟於隣部授以軍麾載觀易地之
能俾服揚旌之貴旣懋師節仍長憲臺勉承顧遇之榮佇
觀輯柔之績可守邕州刺史兼御史大夫充嶺南西道節
度觀察處置等使散官勲封如故主者施行

諭秦宗權制

我國家天歷自歸君臨無外十七聖滂流元澤積潤山靈
三百年保定鴻基方延運祚其間數纏災運禍起凶狂纔
聞竊命之稱已觸震雷之怒或腹心生變或骨肉相圖近
事可明靈誅不漏蓋人祇之共憤乃宗社之儲休亦賴中
外重臣佐佑薄德大恥旣雪小康可期須申誥諭之勤用
致綏懷之旨爾宗權藩垣攸屬倚仗特深雖章表繼來至
誠可驗而兵戈未戢物論猶疑是生交構之端益惑親隣
之聽況位崇將相爵極侯王圖功則國禍可平快志而家

冤已雪勸忠貞於部伍莫若率先鑒成敗於古今當思釋
禍猶冒屬厭之誠適搖怙亂之機且患難雖繁封疆有制
各圖侵軼自掇悔尤高潯之下澤州將攻僞帥周岌之窺
臨汝本利危邦翻爲致寇之資蓋昧啟讎之釁得土地爲
他人所有得貨財亦他人所資勢敵則相傾力均則相忌
害莫深於歸怨利莫厚於圖安況井邑皆空耕桑盡廢歎
瘡痍而未復軫哀痛而難忘且雒邑通都非列蕃之所併
河陽要地亦諸夏之必爭若不制自本朝豈可公然竊據
節旄寵授須俟王人賦稅均輸合資國用至於封疆隣接

續可商議指揮但將還舊京尤藉近鎮繼聞蒲陝已受攻圍河外既事於枝梧關中自妨於漕轉迴車或阻奉國逾虧今者先在息兵各令守境爵位幸非愛惜君臣足保初終尚或執迷方知誤計若法制不行於一處即征伐須徇於衆情人亦有言理難爲黨雖萬方之罪當責朕躬而九廟之威更憑天力縱以黃巢頃盜宮闕曾會師徒既戮元凶須遵後命所以寢興念慮詔示殷勤猶期遠保宿心不欲便乘衆怒山河著誓當明指日之心聖哲好生必用舞干之德佇披深款勉蹈良圖

修奉太廟制

朕以涼德祇膺寶圖不能上承天庥下正人紀兵革競興於寓縣車輿再越於藩垣宗廟震驚丞嘗廢闕敬承典禮倍切哀摧宜付所司

欽定全唐文卷八十七目錄

僖宗二

答高駢請停差發三道兵士詔

討王郢詔

獎高駢築成都羅城詔

招討王仙芝等詔

諭河南方鎮詔

改元廣明詔

命京兆府修郭子儀墓詔

賜鄭從讜詔

賜薛應辭詔

賜薛應辭詔

賜薛應辭詔

賜杜光庭詔

改元中觀爲青羊宮詔

令諸道修紫極宮詔

討楊師立詔

平楊師立詔

平楊師立宣示中外詔

欽定全唐文卷八十七

僖宗二

答高駢請停差發三道兵士詔

蠻蠻如尚憑陵固須倍兵禦敵若已奔退即要併力追擒
方藉北軍助平南寇其三處兵士宜委高駢候到蜀日分
布驅使且務多多之辦寧辭整整之師其河東一千二百
人令竇滸不要差發

討王郢詔

王郢江鄉賤卒營伍微材忽撫御之小乖敢憑陵而搆亂

迫脅將相恣竊干戈劫資財於建鄴之城聚徒黨於狼山之戍尋則浮江泛海掠鎮攻城標掠三州傷殘萬戶又於福建管内毒害生靈凌犯紀綱悖違天地朕爲人屈法惡殺好生累降勅書曲存招諭王郢包藏奸慝誑惑軍師詐示歸降密爲抗拒昨者拘留魯實已驗凶狂今聞再犯溫州顯與官軍抵敵魯實陷在舟楫王師敗於鋒鏃兩浙震驚百姓憂擾滔天之罪擢髮難書然以分野興災雖關定數神祇助順必翦羣凶旣違雨露之恩寧道雷霆之殛是以別銓名將更益雄師兼福建之精兵雜番禺之戰士水

陸俱發腹背齊攻須剋旬時必破妖孽除先徵諸道五千
一百人及福建南海并虔吉衢婺等州兵士外今更抽忠
武軍一千五百人感化軍五百人泗州五百人宣州五百
人都計一萬五千以上前左武軍大將軍宋皓負關張勇
智有韓白英雄累著戰功再居環衛思豺狼之未滅恥荆
棘之猶存誓願長驅速清羣醜今除授檢校左散騎常侍
守右龍武大將軍兼御史大夫充江南諸道招討使應新
舊行營兵士悉取指揮各宜憤激忠誠淬厲戈戟識機翦
撲取勢芟夷速立殊勲迎俟超獎其王郢部下徒黨等或

本同謀議或偶被脅從或因窮餓依投或遭俘縲指使所
宜舍逆取順去暗趨明勉圖富貴榮華勿受驅除翦戮如
生擒及斫得王郢頭歸順者當授四品正員官并賞錢一
萬貫賜莊宅一區如能率衆於所在解甲歸降者亦當厚
與爵賞明垂信誓必不欺渝凡在忠烈之徒皆宜賈勇增
氣

獎高駢築成都羅城詔

省所奏修築羅城畢功并進畫圖事具悉卿天平急召并
絡專征臨邛夢叶於三刀按部恩覃於兩劍上言大鎮空

有子城殊百雉之環迴是千年之曠闕便依陳奏未隔寒
暄每日一十萬夫分築四十三里皆施廣廈又砌長磚城
角曲收逸迭攻而勢勝甕門直截容拒守之兵多利及後
人智高前古繼孔明於掌內坐張儀於腹中是以輕笑木
牛感通金馬增上頭之睥睨架裏面之闌干橋象七星不
移舊岸錦逢三月可濯新濠役徒九百六十萬工計錢一
百五十萬貫卓哉懋績固我雄藩罄府庫之資儲捨陰陽
之拘忌但爲國計總忘身謀並無黎庶之怨嗟不請朝廷
之接借忽聞進奏言已畢功見圖寫之甚明舉神化而急

速方念處身廉潔報國忠貞始終能協於一心清美久聞於萬口欲人檢驗具見公忠朕已知臣何勞請使便欲寵渥恐卿自往雅州既發師徒方勞館驛且留賞典專俟迴軍蜀川既及於春風蠻寇盡離於河岸便酬勲績各進官階勉效七擒佇聞三捷故茲詔示想宜知悉冬寒卿比平安好遣書指不多及

招討王仙芝等詔

亂常干紀天地所不容伐罪弔人帝王之大典歷觀往代遍數前朝其有怙衆稱兵憑凶構孽或疑迷於郡縣或殘

害於生靈初則狐假鴟張自謂驍雄莫敵旋則烏焚魚爛
無非破敗而終蓋以逆順相懸幽明共怒近者龐勛拒命
王郢挺災結聚至多猖狂頗甚尋則身膏原野喉斃僕姑
資財分散於他人親戚誅夷於利刃亦有方從叛亂忽悟
歸降回吉凶於反掌之間變禍福於立談之際諸葛爽今
爲刺史朱實見作將軍宏伯郎任職於禁營宋再雄策名
於淮海莫不身名光顯家族輝榮近者諸道奏報草賊稍
多江西淮南宋亳曹潁或攻劫郡縣抗拒官軍或窘厄商
徒俘掠進奉出彼入此烏逝風驅雖云俊利於一時豈不

憂危於終日以有限之逆黨敵無數之王師寧論歲時必自殲滅朕以寬宏致理慈愍居心每念蒼生同爲赤子恨不均其衣食各致豐肥寧忍迫於鋒鏑斷其身首是以誕敷文誥且務招攜如或不共用兵無悔其王仙芝及諸道賊頭領等見制勅後各宜洗心悔過解甲收兵詣所在州府投降便令申奏必當超授官爵厚賞資財永作忠臣常居祿位其節級自補職掌等亦於大藩鎮內量材與職額衣糧其拋棄田園脅從隊伍者並當撫綏慰勞各令歸業營農是謂捨暗從明得生逃死依朕命者豈不休哉如或

頑傲不悛凶強自恃猶事兵甲尚困鄉閭使田者不耕蠶者不織則須爲人除害非曰黷武佳兵宜令諸道帥臣選練驍勇將卒分兵截道併力合威必務翦除不得縱翫其主兵大將若全擒戮得一火草賊數至三百人已上者超授將軍仍賞見錢一千貫文如斬首級移兵攻徒黨收奪資財器械覆驗撫實者據其功績高下授官賞財如逢寇不追臨陣不戰貪瀆逗撓敗失師徒宜令本州道勘尋準軍法處分應鄉縣田園之內有材傑敢勇之人若能糾率丁夫捍禦寇賊搴旗斬將破陣成功者委所在長吏速具

金史卷之二十一
奏聞亦與官職優賞如鄭溢湯羣之輩皆已分領郡符朝
廷必不食言鄉黨所宜助順於戲宿麥將實秋苗正滋漸
及蒸燠之時豈是戰爭之日惟願務農偃甲布德行恩遍
告州閭各宜知悉

諭河南方鎮詔

王仙芝本爲鹽賊自號草軍南至壽廬北經曹宋半年燒
劫僅十五州兩火轉關踰七千衆諸道發遣將士同共討
除日月漸深煙塵未息蓋以遞相觀望虛費餼糧州縣罄
於供承鄉村泣於侵暴今平盧軍節度使宋威深憤荏蒲

請行誅討朕以威前時蜀部破南詔之全軍比歲徐州摧
龐勛之大陣官階甚貴可以統諸道之都頭驍勇素彰足
以破伏戎之草寇今已授指揮諸道兵馬招討草賊使候
宋威到本道日供給犒設並取上供錢支給仍命指揮都
頭凡攻討進退取宋威處分

改元廣明詔

朕祗膺寶祚嗣守宗祧夙夜一心勤勞八載實欲驅黎元
於仁壽致華夏之昇平而國步猶艱羣生寡遂災眚荐起
寇孽仍臻竊弄干戈連攻郡邑雖輸降款未息狂謀江左

欽定全唐文

卷八十七

僖宗

六

海南瘡痍既甚湖湘荆漢耕織屢空言念疲羸良深軫惻
我心未濟天道如何賴近者嚴勅師徒稍聞勝捷皆列聖
之潛祐寧菲德以言功屬節變三陽日當首歲乃御正殿
爰命改元況及發生是宜在宥自古繼業守文之主握圖
御宇之君必自正月吉辰發號施令所以垂千年之懿範
固百代之洪基莫不繇斯道也可改乾符七年爲廣明元
年近日東南州府頻奏草賊結連本是平人迫於饑饉驅
之爲盜情不願爲委所在長吏子細曉諭如自首歸降保
非詐僞便須撫納不要勘問如未倒戈即時翦撲東南州

府遭賊之處農桑失業耕種不時就中廣州荆南湖南盜賊留駐人戶逃亡傷瘼最甚自廣明已前諸色稅賦宜令十分減四其河中府太原府遭賊寇掠處亦宜準此吏部擢選人粟錯及長名駁放者除身名踰濫欠選考外並比遠殘闕收注入仕之門兵部最濫全無根本頗壞紀綱近者武臣多轉入文臣依資除授宜懲僭幸以辨品流自今後武官不得轉入文臣選改所冀輪轅各適秩序區分其內司不在此限

命京兆府修郭子儀墓詔

漢祖護信陵之冢厥有前聞晉朝修子房之墓垂有故事
況本朝元老功冠鼎彝屬允嗣凋零墟域摧毀雖古無修
墓孔子有言而義存掩骼周王是命斷從朕意適表念功
宜減賜御膳錢三千貫文雇丁匠即日修築仍令所司明
年春仲以太牢祭子儀廟

賜鄭從讜詔

卿志安封域權總戎麾夷夏具瞻社稷全賴今月五日草
賊黃巢奔衝十六日駐蹕梁漢上慙九廟下媿萬方藩閭
乍聞痛憤應切專差供奉官劉全及往彼慰喻卿宜差點

本道兵士酌量多少付北面副招討使諸葛爽俾令入援
賜薛應辭詔

卿等素挺至誠克彰奇節舉靈旗而誓衆顧狡穴以生威
每振軍聲實揚我武今者煙塵未息羽檄尚飛相彼交鋒
終宵疚慮況踰年稔禍連歲興師念其戰陣之勞深究拊
循之意將士等皆爭功用命悉力摧凶唯堅抵捍之心共
雪宗祧之恥哀茲瘡痛不捨朝昏爾宜各勵始終速收城
闕殊功上賞延子及孫帶礪之言神明不昧

賜薛應辭詔

卿等淬礪戈鋌激揚志氣決戰而誓平賊壘爭雄而遠鎮
軍麾久歷辛勤繼當矢石念其報國惟佇酬功所宜早復
都城速擒巨猾唯懸信賞以獎殊庸

賜薛應辭詔

朕自違奉寢園播越梁蜀日往月來首尾三年比元宗避
難之期校德祖蒙塵之數星霜已過收克未期每北望山
河東瞻陵廟想豺狼汗辱宮殿荒涼士庶黔黎悉遭塗炭
松楸桑梓半作蒸薪未嘗不當寢震驚臨食吁歎氣填胸
臆淚灑衣襟蜀國素號繁華朕不觀綺艷教坊樂官繼到

朕不聽笙歌思將帥闕乏衣裝朕服踈布大練憫兵士欠少糧食朕進糲飯素飡言必告天心惟罪已祇待還京之後永期修德覃恩爰自二年以來累與卿等書詔無不殫詞瀝懇實貴感動痴心其於超擢官資遷轉階級存則母妻邑號歿則考妣封榮幽明之間無所愛惜將士等離親別愛冒鏑當鋒有修城下寨之勞逐北追亡之役最爲辛苦尤所憫傷正當窮蹙之秋若不合力齊心一時進逼此時不了更待何時卿宜乘發使人密持書札與諸將帥類會約一兩日佳辰四面進軍諸門齊入以二十萬忠勇之

金史卷之二十一
衆討三二萬殘逆之效用正擊邪破之必矣最忌者不和
不叶相嫉相爭論位妬功彼進我退用軍之弊莫過於斯
實希七月以來刷朕三年之恥向上極有官爵酌報功臣
勿更因循以孤倚注垂淚修語宜體朕心

賜杜光庭詔

勅光庭昔得郭遵大奏青城山齋醮祥異事具悉夫宗元
道觀靈寶齋場星官上奏於殊庭驛騎初傳於詔命光搞
五鳳狀列宿於空中聲吼長鯨若飛霞於豐嶺祥鱗忽現
椽榦分榮神仙難期陰陽不測驗茲祥應自帥精虔追蹤

於五利文成事美於文皇漢武嘉歎所至寤寐不忘故茲
詔示想宜知悉秋冷師皆好否遣書指不多及其修齋道
士等一十七人各賜有差

改元中觀爲青羊宮詔

太上元元大帝與弟子文始先生講真經於樓觀之臺約
後會於青羊之肆便乘雲駕俱入流沙仙記傳聞地圖標
載自周昭至於此日歷數約二千餘年景象寂寥基蹤牢
落今因巡幸靈貺昭彰殊光跳躑於庭前靈篆申明於樹
下甄含古色字驗休徵中和之災害欲平厚地之禎符乃

見足表元穹降祐聖祖垂祥將殲大盜之兵戈永耀中興
之事業須傳簡冊兼示寰區以付史官備令編錄仍模勒
文字告示諸道及軍前其觀可改號青羊宮仍置殿堂屋
宇側近屬觀田地約有兩頃近來散屬黎氓多植葱蒜清
虛之地難使熏蒸已賜錢二百貫便令收贖仍給公驗永
歸精廬宗子特立除官道士李無爲已賜紫所宜昇獎用
慶靈休敬瑄位冠公台風行郡國效節於延洪之代修心
於道德之鄉遂令境內銷兵地中呈寶其如休美倍可嘉
稱

令諸道修紫極宮詔

太上垂祥青羊應現禮宜崇飾用答殊休諸道州府紫極
宮宜委長吏量事修飾仍選差有科儀道士祭醮

討楊師立詔

朕以眇身恭臨大寶唯思克相上帝寵綏四方而況於垣
翰之中臣僚之內豈不能掩其瑕釁而欲肆之法網乎其
包藏禍心違拒君命罪惡已彰其悖亂誅鋤難逭於彝章
迫於羣情蓋非獲已光祿大夫檢校司空兼尚書右僕射
上柱國中山縣開國公食邑二千戶楊師立本實庸材曾

無遠慮幸因薄伎久列禁軍遂委節旄蓋循事例必謂保其富貴勵乃忠貞況自朕出狩巴庸頻加渥澤進水土之劇任兼輔相之殊榮不能上報國恩而乃敢虧臣節昨因制置防遏不肯發兵遂有替移尋昇端揆罔思寵待輒恣凶謀鼓潼水之驚波作左縣之祲氣不遵詔命偷固戎藩動衆興師欲收其郡邑重門守險顯絕於朝廷據綿州奏聞揚師立已於涪城屯兵下寨又差都將郝蠲等占奪綿州帶甲數千去州十里賴有奉國兵士禦敵殺戮大挫鋒鏃城池方遂保全士庶免罹塗炭續據劔州申報揚師立

與刺史姚卓文欲領兵士直赴西川兼署姚卓文充指揮
應使仍與鎮縣書板反狀具明沉聞廣集庸丁教習武藝
稅外恣行掊斂支郡無處完全別制親軍用爲心膂及令
捍寇莫整鼓旗大校阻謀延頸被戮而又致害監庫家累
骨肉洎於判官元從無不罹殃又殺送官告內使更無噍
類深用驚歎此固天地之所不容人神之所共棄其揚師
立在身官爵及先父所贈官兼母所封邑號等並削奪西
川節度使太尉兼中書令陳敬瑄以義事君擁銳敏之師
徒擅訓齊之政令必能勦除逆豎鎮定蜀川已兼諸州都

指揮等使宜令差兵攻討處分應楊師立叛官及將校官吏等如或不同謀議及衣冠僧道百姓等臨事脅從者宜各審詳情狀切務安存無令誤有殺傷致其冤濫其將校等如有梟擒楊師立歸順者朝廷別議獎酬其立功將校等委敬瑄等第聞奏亟行賞典嗚呼作孽者誠自投於法網矣亦由吾理化之道未信於人焉負宸疑思良深自咎布告天下咸使聞知

平楊師立詔

楊師立趨走庸流瓠筭殘品因緣禁旅忝冒藩方迷天地

覆載之恩虧臣子忠孝之道積禍既久懷奸已彰爰自左
川擢居右揆蓋亦全君臣之分益亭育之仁殊不知梟獍
逾凶豺狼難養敢違勅命賊害使臣據蛙井以睚眦固牛
涔而旅拒敬瑄開張武略并奉睿謀選將果得於雄才練
兵莫非於教士舞梯衝而將平雉堞整旗鼓而已挫蟲沙
付高仁厚攻心之謀授鄭君雄反掌之策果梟逆首盡戮
凶徒捷音纔奏於九天喜氣自孚於四海殊勲盛烈前古
無儔已賜詔命獎示訖其首級宜令西川節度使準例處

分

平楊師立宣示中外詔

朕子育萬方爲人父母常欲含哺四海均養九州去三面
之網羅惟一心於教化共躋仁壽永使洽平豈於將帥之
間勲舊之內不思終始遽及誅鋤但楊師立本無汗馬之
勞擢取建牙之任年纔五十位及於公侯恩被一門榮沾
於骨肉有弟與子皆列朝班自母及妻畢開邑號師立之
愛君體國未見一毫唯朕之優遇寵私實爲異等而不知
逆順但使貫盈初則寢廢詔書扇動軍伍後又容縱盜賊
殘害鄉里且巡使是朝廷官員有除移則不許交代監務

是庶邦公事遣區分則堅拒勅文本道不屯甲兵妄占上
供錢物命便尋究虛有支分害監軍使於本城殺官告使
於近驛干紀之謀有素不臣之跡轉彰中外臣寮共知狂
悖包含掩慝未忍疵瑕竟迫於多難之時須明國法止殺
之義難顧私恩遂命西川節度使兼太尉中書令潁川王
敬瑄點校土軍仍委行在都指揮使十軍軍容令孜量抽
三兩道迎駕兵士指期齊進同議討除三令五申止擒元
惡戢兵禁暴不損平人整王師而易若建瓴殲叛卒而勢
同破竹初雖閉壘旋乃下城果見支黨離心魁渠付首不

假別令將帥不勞遠取干戈警歎之餘遂夷梟獍代宗朝
同華節度使周智光亦因國家多難敢逞凶心擅殺杜冕
一家以報私憾及逆節萌露又劫諸道供獻及掠剽行路
衣冠將謂朝廷力不能制亦是未煩征討已爲帳下所戮
師立之事頗類智光猥獠磨牙豺狼當道若存凶逆必長
亂階朕知人不明爵賞踰量盈茲小器煩我大刑況善陣
不交曾無大枉未勞一矢便戮元凶諸道節度觀察防禦
等使位重藩寄義均休戚未覩平戎之奏常深許國之誠
副我分憂固同慶快鄭君雄能分逆順卓有功名拂秋水

以捐軀向錦川而獻首姜膽遽剖袁顱遂梟須議加恩以
激忠節已從別勅超受官資仍賜莊宅錦綵銀器寶帶法
服等餘準詔宜處分